



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL.Anr.237/2025

PANELI ZGJEDHOR PËR ANKESA DHE PARASHTRESA (PZAP), i përbërë nga gjyqtarët: Hajriz Hoti-kryesues, Violeta Husaj Rugova dhe Bujar Muzaqi-anëtarë, duke vendosur përkritazi me ankesën e kandidatit të pavarur për kryetar të Komunës së Hanit të Elezit, Rufki Suma, e paraqitur kundër subjektit politik Partia Demokratike e Kosovës (PDK), dhe kundër Komisionit Qendror të Zgjedhjeve (KKZ), për shkak të parregullsive për ditën e zgjedhjeve, në ditën e votimit për Zgjedhjet Lokale, të mbajtura më datë 12 Tetor 2025, në seancën e panelit të mbajtur me 20.10.2025, merr këtë,

V E N D I M

Refuzohet e pabazuar ankesa e parashtruar nga kandidati i pavarur për kryetar të Komunës së Hanit të Elezit, Rufki Suma, ZL.Anr.237/2025, e datës 17.10.2025, e paraqitur kundër subjektit politik Partia Demokratike e Kosovës (PDK), dhe kundër Komisionit Qendror të Zgjedhjeve (KKZ), për shkak të parregullsive gjatë votimit për Zgjedhjet Lokale, të mbajtura më datë 12 Tetor 2025.

A r s y e t i m

Me datën 17.10.2025, PZAP-i ka pranuar ankesën e kandidatit të pavarur për kryetar të Komunës së Hanit të Elezit, Rufki Suma, të dorëzuar përmes postës me datë 14.10.2025, me të cilën pretendon se me datë 12.10.2025, ditën e zgjedhjeve dyshohet se dy persona që janë të burgosur në Maqedoni si Granit Luri dhe Blend Luri, figurojnë se kanë votuar në Secishte, në vendvotimin numër 2 (3304-2), duke shtuar se sipas ligjit çdo person duhet të jetë fizikisht prezentë në vendvotim për të votuar. Kanë kërkuar nga PZAP që Komuna e Hanit të Elezit të kthehet në rivotim.

Në përgjigjen në ankesë subjekti politik Partia Demokratike e Kosovës (PDK), me datë 18.10.2025, ka deklaruar sesa përket pretendimeve të paraqitura në ankesë të paraqitura nga kandidati i pavarur për kryetar të komunës, Rufki Suma, i njëjti nuk ka ofruar asnjë provë, apo dëshmi për të vërtetuar pretendimin e tij. Tutje, kanë shtuar se në qendrën e votimit ku pretendon se ka ndodhur parregullsia, kanë qenë tre komisioner të parashtruesit të ankesës, dhe asnjëri prej tyre nuk ka deklaruar ndonjë ankesë ose kundërshtim lidhur me procesin e votimit, të cilën e ka konfirmuar edhe kryesuesi i KKZ-së në Han të Elezit, Enver Suma. Kanë theksuar që kërkesa që të vërtetohen pretendimet nga PZAP, është e paarsyeshme për faktin se parashtruesi nuk ka ofruar asnjë bazë faktike, ashtu që kane kërkuar që të refuzohet si e pabazuar ankesa. Si provë kanë bashkangjitur përgjigjen e kryesuesit të KKZ-së, Enver Suma.

Në përgjigjen në ankesë KKZ ka deklaruar se pas pranimit të ankesës nga PZAP më datën 17.1.2025, kanë kontaktuar me KKZ, të Hanit të Elezit, nga i cili kanë marrë përgjigjen dhe konfirmimin si më poshtë: "Pas shqyrtimit të ankesës se në Qendrën e Votimit 3304/02, Secishte kanë votuar dy persona të cilët janë të burgosur në Maqedoni. KKZ i Hanit të Elezit si trup zgjedhor dhe akteret e tjerë zgjedhor si Menaxheri Qendrave të votimit dhe Këshillat e vendvotimeve nuk kanë deklaruar dhe nuk janë ankuar për asnjë moment në lidhje me

pretendimet për probleme dhe parregullsi zgjedhore në këtë Qendër të Votimit. Ju kujtoj që në këtë vendvotim 3304/02 sikurse në të gjitha vendvotimet e tjera kandidati i pavarur (Rufki Suma) ka pasur 3 komisioner (LVV, AAK dhe komisioneri i KP dhe 3 vëzhgues të cilët kanë qenë përkrahësit e tij sipas marrëveshjes së tyre), asnjëri prej këtyre 6 persona nuk është ankuar se ka ndodhur ky rast, të paktën njëri prej tyre kishte reaguar bile edhe fuqishëm nëse kishte ndodhur. KVV dhe menaxheri i kësaj Qendre nuk është ankuar. Andaj në si KKZ iu sigurojmë që procesi zgjedhor i mbajtur më datë 12.10.2025, ka qenë i rregullt, i sigurt dhe transparent, i vëzhguar nga kamerat e vendosura në çdo vendvotim po ashtu edhe nga vëzhguesit e subjekteve politike dhe të atyre ndërkombëtare”. Tutje KQZ kanë deklaruar se pala ankuese nuk ka bashkëngjitur prova të mjaftueshme që do të mund të dëshmonin apo mbështetësin pretendimet e saj paraqitura në ankesë.

Paneli Zgjedhor për Ankesa dhe Parashtresa - PZAP, pas shqyrtimit të ankesës dhe shkresave të lëndës, pretendimeve ankimore, përgjigjeve në ankesë, vëren se ankesa është e pabazuar. Paneli pas shikimit të shkresave të lëndës dhe përgjigjeve në ankesë të paraqitura nga subjekti politik Partia Demokratike e Kosovës (PDK) dhe KQZ-ja, vlerësoj se pretendimet e kandidatit të pavarur për kryetar të Komunës së Hanit të Elezit, Rufki Suma, janë të pa qëndrueshme dhe si të tilla i refuzoj për faktin se nga veprimet e përshkruara në ankesë nuk është arritur që të vërtetohen se ka pasur parregullsi në qendra të votimit të cekura në ankesë dhe se kanë nënshkruar persona të cilët janë në burgim, e të cilët nuk kanë qenë prezent në vendvotime. Paneli i vlerësoj se janë të pa qëndrueshme dhe si të tilla i refuzoj, për faktin se parashtuesi i ankesës nuk ka mbështetur pretendimet e tij me prova, rrjedhimisht nuk ka ofruar dëshmi të qarta dhe bindëse lidhur me shkeljet e supozuara, edhe pse me kuptim të nenit 117 paragrafi 3 të LZP-së, barra e të provuarit bie mbi ankuesin dhe në rastin konkret, paneli, nuk mundi të konstatoj se kanë nënshkruar persona të cilët janë në burgim, e të cilët nuk kanë qenë prezent në vendvotime.

Po ashtu edhe nga përgjigja e KQZ-së, të cilën e ka konfirmuar edhe kryesuesi i KKZ-së i Komunës së Hanit të Elezit, Enver Suma me përgjigjen e datës 17.10.2025, në të cilën konstaton se *“KKZ i Hani i Elezit gjatë gjithë kohës ka qenë në vizita nëpër Qendra të Votimit dhe askush nga KVV dhe menaxheri i kësaj qendre nuk është ankuar, votimi ka qenë i rregullt, i sigurt dhe transparent, i vëzhguar nga kamerat e vendosura në çdo vendvotim po ashtu edhe nga vëzhguesit e subjekteve politike dhe të atyre ndërkombëtare.”* Në këtë kuptim Paneli vlerëson se nuk qëndrojnë pretendimet e parashtuara me ankesë sepse ankuesi nuk ka bashkëngjitur asnjë provë të vetme, dhe as në Librin e Evidencës nuk është evidentuar asnjë vërejtje, me të cilën do të dëshmohet se ka ndodhur parregullsia e pretenduar.

Andaj duke u mbështetur në nenin 117.3 të LZP-së ku përcaktohet se *“Vendosja për ankesat nga PZAP-ja mbështetet në dëshmi të qarta dhe bindëse”*, Paneli vlerësoj se pretendimet e tilla janë të pa qëndrueshme dhe si të tilla i refuzoj, për faktin se veprimet e përshkruara në ankesë, ankuesi nuk ka arritur që ti provoj me asnjë prove të vetme.

Nga arsyet e theksuar më lartë duke bazuar nenin 117 paragrafi 3, neni 118 paragrafi 1 të LZP-së, Paneli vendosi si në dispozitiv të këtij vendimi.

Paneli Zgjedhor për Ankesa dhe Parashtresa
ZL.Anr.237/2025 datë 20.10.2025



Këshilla Juridike: Kundër këtij vendimi është e lejuar ankesa sipas nenit 118 paragrafi 4 të Ligjit Nr.08/L-228 për Zgjedhjet e Përgjithshme në Republikën e Kosovës, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimit të këtij vendimi.